

獨

學

廬

四

稿

獨學廬四稿目錄

卷一

論

鹽法論

辨惑論二

記

金壇縣重修儒學記

吳縣木瀆鎮義學記

新學禮器記

重修圓妙觀三清殿記

先世祠堂記

常熟石氏祠堂記

靜寄閣記

張氏義莊記

嘉興楞嚴寺經坊記

吾與菴鐘樓記

吾與菴後記

洞庭東山席氏先世圖譜記

百老圖記

南繼訓練圖記

南園授經圖記

道光三年賑饑記

收葬無主之棺記

關帝廟玉印記

重修福濟觀純陽呂祖師大殿記

餘姚縣重修學宮記

卷二

文二

張氏四書集解序

三國志辨微序

吳懶菴經史論序

經史管窺序

墨海金壺序

關聖帝君聖跡圖志序

孝行錄序

林和靖詩序

明周忠介公文集序

周介生文集序

袁文箋正序言

謝東墅先生食味雜咏詩後序

謝東墅先生六書正說序

凌波閣藏書目錄序

洪氏集驗方序

功過格序

重刻太上感應篇圖經序

醫藥局徵信錄序

卷三

文三

松陵詩徵序

孫淵如詩序

彭瑤圃侍御詩序

王芥山詩序

董午橋遺草序

戊戌吟草序

顧德草詩序

醉薌仙館詩序

養默山房詩序

卷勺彙編序

雪齋詩草序

張會无文稿序

蘿山文稿序

芹香課藝序

天崇文英序

院課存真序

國朝文英序

國朝文英二集序

崑新志序

借秋亭試帖序

卷四

書

與龔璉人孝廉書

頌

理安課經圖頌爲了圓上人作

贊

三教圖贊

畫屏贊

伏生授經

琴操參禪

明董念修先生畫象贊

祝枝山沈氏良惠堂銘贊

明周忠介公遺像贊

參寥子像贊

蔣元庭侍郎觀我圖贊

徐太淑人繡軸贊

澄谷風公倚杖圖贊

嘯溪和尚畫像贊

銘

福雲泉銘并序

康郎木筆筒銘

竹翻臂銘

淄川石硯銘

端石硯銘

綠石硯銘

天然硯銘

又

端石硯銘

石子硯銘

草檄硯銘

紫石小硯銘

圓硯銘

端石竹節硯銘

十兒定婚之硯銘

第九女錦雯學書硯銘

澄泥大硯櫝銘

孫女綺春學書硯銘

朱竹垞先生遺硯銘

端溪石硯銘

跋

讀周禮

許氏說文解字跋

讀韓文公集書後

明趙文毅公文集跋

翁氏吾妻鏡補跋

聽鶯閣文稿跋

跋王簣山家藏劉珣馬南巡圖卷

木蘭秋獮圖跋

乾隆癸丑同館圖跋

七峰振秀圖跋

王二樵寶鼎精舍圖記跋

題嘉興戴松門家藏郭泰碑後

溫佶碑跋

七姬墓志跋

楞嚴經跋

卷五

傳

清秋居士家傳

孫太宜人家傳

江烈婦家傳

碑

德清縣城隍廟碑

墓志銘

周蓼疇墓志銘

浦江知縣岳君墓志銘并序

吳枚菴墓志銘并序

嚴少峰墓志銘并序

內閣學士錢公墓志銘

徐孝子墓表

四川叙永直隸同知周君墓志銘并序

俞太孺人墓志銘并序

徐石軒同知墓志銘

十一郎壙志

祭文

王惕甫祭文

獨學廬四稿卷一

東吳石韞玉著

論

鹽法論

法久無不敝之理鹽法至今日而敝已極考今世官定引鹽之額將及百年此百年中生齒之繁不啻十倍而歲額不加增是四海之衆食官鹽者十之一食私鹽者常十之九也私鹽之價其利卽十倍於本猶不及官鹽之價則其利饒矣私鹽之利旣饒則閭閻無賴之徒羣趨乎其

中官雖設厲禁以禁之而卒不可禁何也私販之徒富者出財貧者出力近海之地動輒累千萬人其强有力者曰梟平居以錢募窮乏之人爲之私販而坐收其利官遣兵役捕之則潛遁無蹤必欲索而得之則聚衆拒捕其人家藏兵器雖鎗炮火藥皆有之故兵役畏其强而不敢問其兵役之黠者則又私受其賄爲之耳目官之不肖者或亦染指焉至地方偶獲一販私之犯例必窮詰其往來之迹凡牧令失察過境者皆有咎故牧令亦以緝私爲苦而不樂爲如此

而欲緝私以暢官引之銷此必不可得之勢也
且閭閻無賴之徒羣萃而州處又擁厚利以資
其生欲其安分而不為非亦不可久也故曰鹽
法至此時而極敝也今思為之變計莫若廢綱
商而按竈以收其稅夫鹽無論公與私其源必
出於竈國家設鹽場大使原以稽察竈戶也然
竈戶煎鹽以賣與官商與賣與私販之人大使
不得而知也今若按竈計鹽每竈歲煎鹽若干
則徵其稅若干其稅額視綱商之額略減焉以
留餘力於竈戶設有淫雨水溢之災則確勘而

豁免焉如此立法亦竈戶所樂從也大使徵竈
戶之稅而納諸運庫運使綜覈其數而報諸鹽
政官制悉仍其舊而毋容變置焉此法立而無
不稅之鹽其課必有十倍於今之課者經費既
紓則歲取於農民者可量為裁損此亦崇本抑
末之道也國家理財之術未有善於此者也彼
商人謀利者就竈戶市其鹽東西南北聽其所
之而不問官無私販之禁則兵役無需索之弊
牧令無處分之憂鹽梟亦化良民無聚衆拒捕
之禍國家安人之術亦未有善於此者也頻年

往來邦江之上觀夫牢盆為業者每太息於調劑無策乃作此論以俟采風問俗者擇焉

辨惑論二

今之人惑終身不解者二事一星命之說一堪輿之說是二者人人信之仕宦者尤甚推其故無非富貴利達之心縈結於胸中而不可解既患得之又患失之既於其身又於其子孫而術人迎其欲而投之無怪乎舉一世之人而趨之若鶩也執星命之說者曰人生受命於天貴賤貧富壽夭有定數焉一成而不可變其說是

也然以四柱五行推之則非也人之命定於有生之初然一日止有十二時而世間生人之數無窮必不能以十二命該之也且四柱之術以五行生尅為主而古者歲月各有其名惟紀日始稱甲子故屈子離騷云攝提格於孟陬兮惟庚寅吾以降其文甚明晰也今歲月日時悉以甲子為紀古無是名也無是名即無是理而何生尅之有昔者余所交友有四人焉一吳雲一施源其生年月日時皆同也吳由翰林起家官至彰德太守施以鄉科起家官黟縣令其官階

不同也然猶不甚相遠又其甚者一孔傳金一
陳鼎其生年月日時亦皆同也孔以鄉科起家
官至南陽太守陳以諸生窮困終其身吾不知
此四人之命如何推法得乎此即失乎彼吾知
其術之必窮也然則星命之說不足信也孰堪
與之說者曰生人祖孫父子一氣相通祖父葬
而得山川靈秀之氣則子孫必富貴壽考其說
似是而實非也謂祖孫父子一氣誠是矣然世
之人有祖父康強而子孫羸瘠者矣有祖父壽
考而子孫凶折者矣祖父生前子孫尚不能分

其氣而謂既朽之骨得氣則子孫即食其報有是理乎周之武王有天下周公為冢宰而管蔡身受大戮伯夷叔齊餓死首陽之下而仲子撫有孤竹之國柳下惠為聖人而蹠則為盜吾不知其祖父之墓若何其子孫禍福何若是之不齊也然則堪輿之說不足信也杭人有蔣編修詩者自詡星命之學百不失一又愛談地理嘗曰吾杭地脉嫩可以朝葬而夕發也余戲曰請以子之矛攻子之盾如星命有憑則命而富貴雖以凶地葬其祖父無傷也命而貧賤雖以吉

地葬其祖父無益也是堪輿之術不足言也如地理有權則葬得其地命之貧賤者富貴矣葬非其地命之富貴者貧賤矣是星命之術又不足言也蔣適其詞曰惟祖父葬得其地而後子孫有富貴之命余曰人之命定於有生之初而葬其祖父常在成人之後信如斯言則杭州地脉雖嫩而朝葬夕發之說又不確也蔣詞窮一笑而罷余因著是論以曉夫世之惑於術人之說者

記

金壇縣重修儒學記

自釋老二氏之教興琳宮寶剎徧於中國竭土木之力輪奐莊嚴而學宮齋廡往往上雨旁風無人過而問焉豈斯人之心輕吾道而重異端乎亦無人振起之爾金壇在江淮間為彈丸之地自文襄于公以狀元宰相翊輔

聖皇文武兼資贊襄密勿而金壇遂為東南望邑然文襄既沒四十餘年無有人繼起者豈古今人不相及耶抑山川靈秀之氣一盛一衰與時消息也嘉慶二十四年盱眙戴君開文司教

是邦見夫學宮頽廢盡焉傷之告於邑令因舊
謀新邑中士庶踴躍將事集費庀材於道光元
年正月興工將聖殿兩廡盡撤其舊材而更新
之其明倫堂尊經閣鄉賢名宦忠義孝弟七賢
七君子等祠皆次第繕完塗墍丹雘煥然一新
又於泮池前築宮牆一座列東西兩坊繚以周
垣右邊餘地闢為射圃又因形家言於學宮之
左創建魁星閣一所以為形勝閣之東南舊有
金沙學舍因加修葺移尊經閣所祀文昌像於
其中凡經之營之暮年而工始竣戴君述其始

末俾予為之記予生長吳下足跡未嘗至斯邑
然自束髮讀書以來曾為學官弟子則亦忝列
於孔氏門牆者也即事有述安敢以不文辭竊
惟聖人之教與日月山川並垂終古固不以廟
貌之興廢為盛衰而人之奉聖人者高山景行
莫不嚮往不有所寄將何以申其瞻仰之思此
學宮之制亦本乎斯人懿好之心而設焉者也
方今文教昌明薄海內外道德一而風俗同今
天子龍飛之始即敬題聖協時中之額頒於直
省州郡懸諸大成殿以示尊師重道之意而金

壇適於是時修治文廟殆斯邑人文興起之機乎宰是邑者前為貴州王君青蓮後為浙江朱君蘭後先繼美捐俸以為邑人之倡而縣丞聶君心通典史辛君聘三各襄其事教諭戴君開文訓導俞君光祖暨邑之人士皆與有勞焉別石書名用垂不朽

吳縣木瀆鎮義學記

古者家有塾黨有庠術有序十室之邑必有絃誦之聲是以教化行而風俗美人心感而天下和平也三代之制大學在國中國之元子與貴

游子弟皆就學焉小學在四郊則國人子弟之秀良者聚乎其中先王豈故為此瑣瑣而不憚煩哉良以學校者教化之本也自古制既廢所謂學宮者止為春秋釋奠先師之地而博士之庭不聞有過而請業者由是變而為書院以課士然書院止課成學之士而殿最之童蒙不得而入焉則又廣而為義學義學正古時四郊小學之遺制也夫貴游子弟地望清華守父兄之訓其趨於學也較易若鄉人而不學其愿者椎魯無文其黠者且冒上亡等而不知罪一耰鋤

而德色一箕帚而評語沅極既衰釀成世道人心之害夫是故小學之設比之大學尤汲汲也吳門之西有鎮曰木瀆距城三十里而近縣有丞駐其地西望靈巖高與天齊納太湖之水烟波萬頃近在咫尺間其地踞湖山之勝居者烟火萬家野處不暱其秀民之能為士者亦往往而有鎮上舊有義學以教其鄉之子弟凡貧不能具束修之資者皆就學焉其室廬飲食諸費皆贖金以給之事久頽廢嘉慶十六年縣丞李公再涑倡衆興修由是集金錢五十五萬存本

收息以給修脯李公是舉可謂知本矣襄其事者皆尚義之士不可以不志也因為之記而列其姓名於後

新學禮器記

太史公嘗云登仲尼廟堂觀車服禮器所謂器者凡鐘磬羽籥簫豆尊罍之屬皆是也蓋自秦漢之後變禮易樂先王法物有司盡失其傳所幸孔氏之門守器弗失觀者於此猶可追想三代制度之舊焉方今文教誕敷夫子廟堂徧天下吳地有郡學一縣學二郡學大吏主其祀縣

學則縣大夫主之長洲元和之新學在城東平江路之南道光三年靈雨爲灾廟宇滲漏長洲尹俞侯元和尹王侯旣捐俸修葺之矣廟中禮器不備春秋二祭時草率不能備物俞侯慨然思有以補其闕商於元和尹共籌費四百八十金付諸生營造之凡置銅爵三十三銅登一銅鉶八簠簋二十四邊豆百燭臺二十四香爐十二燎鑪一編鐘十六編磬十六佾舞之衣三十六其琴瑟羽籥祝敔鼗鼓等則先是諸生醵金置之由是禮樂諸器粲然大備或曰孔子不云

乎禮云禮云玉帛云乎哉樂云樂云鐘鼓云乎
哉先聖王制禮作樂皆有精意存焉非區區守
其器而已也雖然形而上者謂之道形而下者
謂之器道也者寓於器而後長存者也若謂執
乎器不足以言禮樂則舍乎器又何以知禮樂
哉今茲禮器既備他時舉春秋祀典籩豆有楚
肴核維旅樂具入奏神聽和平橋門觀聽者恍
然如見洙泗之遺風焉豈不盛歟是舉也長洲
令俞公德淵倡其事元和令王公有慶許公乃
大助成之承造者諸生顧家瑞徐昂尤覲宸楊

珍陶亮采顧辰例得備書余伏處里閑於諸生
忝一日之長幸逢其盛敢記其事而鐫諸壁以
備後之人稽考云

重修圓妙觀三清殿記

蘇城圓妙觀古之天慶觀也肇基於晉咸寧中
法門香火經今千五百餘載黃冠之士雲集於
其中其大殿崇奉三清像重屋四檐規模大壯
嘉慶二十二年歲在丁丑孟秋之月疾雷破柱
毀其西北一隅維時大司寇韓公對銜恤在籍
率衆捐金鳩工修治而工師求大木不得衆情

觀望無策施工明年常熟頻海漁人懸罟入水
忽重不可舉竊意以爲網得大魚糾集多人拽
入福山口潮退視之非魚也大木偉然偃卧於
沙灘之上邑人以告公命工度之其長七十尺
有奇其直中繩其圍中規適副所用苟非海若
効靈斯木何由而至良材旣得涓吉興工觀者
色動檀施踊躍財力旣阜百工皆備凡采楠之
朽蠹者新之瓠甕之損裂者易之旣塗旣茨加
以丹雘美哉輪奐頓還舊觀山門土木歲久毀
敗復以餘力繕完之是役也經始於戊寅四月

落成於己卯九月韓公爲之倡而董封君如蘭
蔣待詔敬等實成其事工旣告蒧是歲十月恭
逢

天子六旬萬壽鄉之士大夫卽其地啓建經壇
祝釐稱慶萬姓瞻仰僉曰此事實徼福於天非
人力所及非常盛事當有所述以垂於後予謂
是舉也有三善焉山海効靈神木自至可書者
一衆情鼓舞不日觀成可書者二保佑申命
天子受禧可書者三有此三者敢不述以告後
人於是乎書

先世祠堂記

吾家先世居丹陽係宋學士曼卿先生之後先高祖值明鼎之革出家爲僧釋名智遠而初名不傳先曾祖君甫公於順治二年遷於吳門時年纔十有三有吳氏壻之於甥館此始遷蘇州之祖也曾祖生丈夫子二長伯祖荆王公次先祖寧周公荆王公再傳而絕寧周公生先考惠疇公惠疇公生四男其三皆殤最後生余蓋寒宗之不絕也如綫先曾祖初居飲馬橋先祖居廟堂巷先考乃移居金獅巷則余所生之地也

予家世未通仕籍執庶人之禮祭於寢余遭逢
聖明之世及第升朝官於中外食祿十有八年
忝從大夫之後禮當立廟以祀其先人而因循
未果今余年已七十勢不可再緩爰以所居之
西屋建祠三楹一廟三龕同堂異室奉曾祖祖
考三世考妣而婦人未及於世者則祔於祖姑
其西爲夾室以藏祧主每歲終則合享焉祠北
向於陰道爲宜於庠古之宗法不可行於後世
也久矣古者諸侯世其國大夫世其家故主祭
者常在大宗而支子不祭後世卿大夫自一命

以上皆選於王朝嫡子支子貴賤無常夫祭用
生者之祿嫡子賤而支子貴勢不可以卿大夫
之尊降而就庶人之祭故禮之不可襲也時爲
之也記曰當其可之爲時此之謂歟禮大夫有
三廟而今爲一廟不敢援世及之制也分三室
仍存三廟之意也後世子孫而卿大夫焉守此
不爲褻後世子孫而庶人焉守此不爲僭名之
曰石氏家祠不敢以宗自居也祠成於道光五
年季夏之月謹作記書石而登諸壁

常熟石氏祠堂記

常熟宗人大文旣卜其縣河西之地啓建家祠
祠成遣孫榮奎來述其事而請爲之記竊惟吾
家得姓甚古春秋時其姓已散見於諸侯之邦
至漢時萬石君以孝謹聞乎郡國諸子皆通顯
挂名朝籍族於是乎始大今之在丹陽者以宋
學士曼卿先生爲始祖予與大文皆出學士之
後予家自順治二年由丹陽移家吳門而大文
之先有諱憲者明時由丹陽徙居常熟自憲十
傳至大文有譜牒世系可考也今其族人在常
熟者椒實繁衍亦各分析以居而大文所建祠

則自其祖丹卿公始以下子孫祔焉其他旁治者皆不及禮曰別子爲祖繼別爲宗繼禰者爲小宗古人親盡則祧之義當如是也祠成於嘉慶二十三年大文率宗人而落之築盛豐潔牲牢不備昭其儉也祭畢而享飲酒三爵毋及於亂昭其敬也凡所以尊祖敬宗收族以孝以謹猶有先人之遺風焉予與大文雖疎遠由曼卿先生推之則諸父行也嘉其行事有古人之風故樂爲之記

靜寄閣記

晚香樓之東有小樓二間置几安床以爲偃息之所名之曰靜寄閣客有過而問焉者曰有說乎予應之曰有易云吉凶悔吝生乎動機之動者吉一而凶悔吝居其三焉靜者動之對也故天之道靜則五行順其序四時協其紀其動也移星易宿迅雷風烈占者以爲災地之道靜則九州奠其位百物遂其生其動也山崩川竭龍蛇起陸史冊書之以爲宇宙之大變風之靜也導迎和氣長養庶類而動則拔木偃禾邦人大恐江湖之靜也舟行者若履平地而動則波濤

如山檣傾楫摧當之者死生在呼吸之間故人之生於世也靜者生之門動者死之路嗜欲攻於內筋力勞於外凡一切可喜可怒可驚可懼之事皆生於動而靜者無事也是故有道之士必守其靜而不妄動吾將勉焉客曰靜之義旣得聞命矣敢問何謂寄子笑曰天地之間何物非寄乎日月星辰寄於天山川草木寄於地視聽言動寄於人三才一貫之理無物而非寄也故天地之化往者過而來者續人以血肉之軀受天地虛靈之氣以生一旦氣盡則此身且消

歸於無何有之鄉矣庸非寄乎生人之壽修者
不過百年而中道夭折者踵相接也此其寄也
物之尤暫者也而又何疑乎吾以此生寄於天
地之間而塊然之身則寄於斯閣之上守靜而
不敢妄動以順受天之命而已矣客去乃筆所
言以爲記

張氏義莊記

天下風俗之美始於一鄉而又始於一家古人
有言愛無差等施由親始蓋親親而後仁民事
有次序故睦婣任恤之誼聖王尤嘉尚焉吾鄉

自有宋范文正公創立義莊以贍族人迄今七
百餘年時代屢易而范氏子姓克守其田廬墳
墓不至散而四方者義莊之效也元和張君鳳
德生有至性孝於其親勤於治生以居積起家
自奉儉約而好善樂施鄉里族人待之舉火者
數十家乾隆乙亥吳中大饑君出家財千金助
賑冬捨棉衣夏施茶藥一切善事可以裨益於
人者爲之孜孜不倦嘗欲捐義田以贍族人之
貧乏者未及成而謝世今其子慤祖紹承先志
以三千三百金於蘇城東北隅懸橋巷置屋一

所建立義莊置田一千畝有奇積其穀以潤其族人可爲善繼善述者矣吾嘗慨夫世人專利自封視其族人若秦人之視越人有無不相通緩急不相顧曾不思祖宗之視其子孫無非一體水源木本之謂何而顧若是其怱也若張氏父子以解衣推食之心成其展親睦族之誼此固鄉人所宜觀型者焉故不辭蕪陋而爲之記

嘉興楞嚴寺經坊記

嘉興楞嚴寺之有經坊也自紫柏大師始也明時大藏經板秘在內府外人祈請甚難師故發

願重刻改梵本爲方冊以便流傳初定章程徑
山藏板楞嚴發經各出矢言以要永久其後紹
述無人道場頽廢楞嚴所設經坊有名無實而
徑山所藏經板亦朽蠹過半識者傷之吾鄉彭
編修蘊輝家世樂善早耽淨業與其婦翁故相
吳公璫發願修補請會一上人住般若堂主其
事適餘杭令張公吉安亦吾鄉善士也將徑山
經板盡送楞嚴寺由會公清釐之而殘缺已多
不成卷帙間有捐刻者機緣未廣弗克集事其
時彭編修已棄世會師乃致書吳公白其由并

購櫟本寄京吳公乃與都門士大夫之修淨業
者鳩集多金翻刻新板一分寄歸楞嚴寺中其
時方丈主僧爲竹庵觀公刻架度閣募工刷印
偶有闕失隨時修補於是方冊經文頓還舊觀
竊維世間一切事皆有時節因緣方紫柏大師
初立經坊於般若堂與禪堂並建彼此不相涉
故當會公在堂結集經板時方丈藹如和尚不
與其事而因緣未至會公受彭編修之託苦心
勞慮越十有餘年其事迄用無成今藹公會公
先後棄世而經板適剏工竣自北來南觀公

乃身任經坊之事由是般若堂與方丈合而爲
一有仔肩之任無掣肘之憂紫柏一燈復光明
於旣燼之餘大教流傳其在斯時歟予往來於
楞嚴山門十有五年矣昔悲會公之賁志以歿
今幸觀公之克受其成也因述其始末而爲之
記

吾與菴鐘樓記

支硎山之麓有靜室焉曰吾與庵向爲寒石大
師幽栖之地師旣圓寂其孫心誠上人居之菴
向時無鐘道光初元邑人陸君士宏發願鑄鐘

鐘既成諸善姓醵金建樓於山門之左樓兩層高三仞有奇縣鐘其上縣之日海衆雲集引椎發聲鏗然遠聞或曰招提之室必有鐘何也予應之曰閻浮提世界其人以耳治故觀世音菩薩以聞思入道而慈悲普度衆生於中華最爲靈感試思音本無相何以云觀蓋聞性在心聲入則心通聲從虛空來與心相感不啻有相之可觀焉鐘爲金椎爲木金木皆無聲以椎擊鐘則聲生謂聲出於椎而椎本無聲謂聲出於鐘而鐘非椎不鳴然則鳴者鐘也所以鳴者非鐘

也人大叩大鳴小叩小鳴若飲於海者隨其
量而受之因應之機微妙甚深杜子美云欲覺
聞晨鐘令人發深省夫鐘亦何與於人而發省
哉其中必有感焉爾因作頌曰

萬事本黃鐘金爲八音長寂然太虛中忽發微
妙音淪淪大海潮鯨喏而鼇吼衆生舍覺性聲
入則心通聞性不在耳亦不離耳根聞聲而不
知乃是妄聽者所以大法王以聲音說法世間
聞聲者一切大歡喜

吾與菴後記

由蘇州府治西行一舍有山曰支硎晉林公之道場所在也其旁有靜室曰吾與庵澄谷大師自天台來卓錫於此其地在平陸四山環之東望靈巖西接天平寒山諸峯曠如奧如信方外栖真福地庵中大殿供釋迦文佛有金塗塔在焉殿後屋三楹彭尺木居士顏之曰披雲草堂西廂曰雲外室東有小閣曰見山閣因其與靈巖相望而得名澄師先後居此三十年常以清靜無爲爲本澄師旣化其孫心誠上人紹承祖德閉戶清修海衆皈依善緣輻輳於道光初在

佛殿東南築鐘樓一座朝暮發微妙音令人發
省又於三年在披雲草堂之後建大悲寶閣五
楹中奉西方三聖西奉大悲菩薩又積檀施之
餘置膳田五十三畝以爲常住餽粥之資於是
道場規模粗具考是庵爲善音庵故基歲久荒
廢自澄師來止改名曰吾與庵吾因紬繹吾與
之義昔仲尼有言曰吾非斯人之徒與而誰與
聖人悲天憫人必欲四海六合之人盡登康樂
和平之域而後已而釋迦文佛自光音天降生
淨飯王家廣說清淨正法除衆生一切苦惱非

孔氏悲憫天人之意與大悲菩薩立願普度衆生亦此意也然則大悲閣之建猶是澄師吾與之義也若心誠上人可謂紹隆無替者矣林子衍源向有庵記今就近年所增益作後記

洞庭東山席氏先世圖譜記

洞庭東山席氏自唐武衛將軍溫由關中避黃巢之亂移家南來迄今將及千載其間或以仕宦或以經商散而至四方者雖有其人而山中子姓尚羣萃州處蔚爲望族吳中世澤之久長無有出其右者蕙生孝廉余老友也其爲人也

恂恂然謹言慎行束脩自厲有古君子之風此
冊序其先世譜牒溯其始祖得姓之由在春秋
時有伯厲爲晉正卿典籍因以籍爲氏其見於
春秋時者若籍偃籍談皆是也至楚漢時避項
籍之名改籍爲席遂流傳至今唐以前世次不
及詳自武衛將軍至蕙生則第三十五世宗系
名氏釐然可攷又繪武衛將軍及其二十七世
孫洙以下九世遺像彙集一冊而以己身課子
圖附於尾此其尊祖敬宗之心可謂勤矣禮曰
上治祖禰尊尊也下治子孫親親也自譜學之

不講士大夫有數典而忘其祖者矣今世能知水源木本之義者幾人哉尊祖敬宗如蕙生可
以爲難矣

百老圖記

人生五倫之中君父一而已兄弟夫婦皆有數
惟朋友則盡四海九州之人而皆是也然死生
聚散人皆不得免焉欲求其聲音笑貌常在目
前此必不可得之勢也金君東屏善繪事寫真
尤工晚年發願爲百老圖自搢紳先生以及縫
掖之士布衣之人無所擇第擇其有文行而齒

在六十以上者由一人二人積至百有餘人矣
心猶未已也吾鄉耆艾無不與焉四海九州之
人亦往往而在暇日攜以示予其不相識者姑
置之但平生有一面之交者皆能識其爲某人
某人嗟乎技至此亦神矣維時予年六十有三
已及格因亦爲予肖一像解衣坦腹而坐旁卧
一鹿置盆水於前旁薄自得之致流露於豪楮
間予生平所畫真未有肖於此者也因思人生
不過百年惟託諸翰墨乃可以不朽史乘可以
傳人姓名詩文可以傳人性靈獨至容貌顏色

非畫不傳今此冊中人逝者已多矣而披圖者
宛然同堂接席罄欬乎其側也更歷數十年畫
中人無一存者而容貌顏色長存於天地之間
是此一百有餘人皆因斯圖而不死也是可述
也

南縣訓練圖記

國家設兵以衛民而養兵之費卽取諸民以爲
用百姓之力有限則太平無事之時勢不能常
蓄多兵以糜餉故兵之分防郡縣多者不過數
百人少者數十人而已一旦奸宄竊發若專恃

官兵以禦亂必衆寡不敵不得已而召募土人以自助觀史冊所載動輒募兵以千計以萬計職是故也後世守令所募之人不敢直謂之爲兵因而易其名或曰義民或曰鄉勇其名雖異其實皆兵也因其爲土著之人急則聚之而爲兵緩則散之而爲農其法至善蓋守望相助猶有古者厲兵於農之遺意焉往予守重慶適逢白蓮教之亂川東川北處處戒嚴予設爲團練輪操之法所屬二州十一縣各募壯丁三百人以百人在城防守二百人休於鄉十日一更以

均勞逸有事征調一呼而集者可得四千人其費卽出在本鄉之民不煩官帑如是者五年武功旣歲而後散遣歸農當是時賊人屢窺重慶之境而卒不敢犯閭閻恃以無恐則此團練之效也竊以爲牧圉而籌捍衛之方未有善於此者也嘉慶十八年奸民林清作亂三輔之地所在蠢動伍泰庵明府方宰鉅鹿鉅鹿者四達之衝昔項籍救趙諸將皆從壁上觀之地也維時風鶴之警環於四境明府乃訓練丁壯守衛城池日費金錢數萬皆出私財給之故其時賊人

縱橫三輔之間而鉅鹿獨安堵無恙則明府團練之力也寇賊旣平大府叙其勞而器其才移治廣平負郭之永平縣明府追維往事繪爲南縣訓練圖卽古人不忘鉅鹿之意道光元年春明府以公事來吳出圖見示因爲叙其始末并著鄙論如此

南園授經圖記

余於乾隆庚子辛丑兩試春官不第而歸結碧桃之社同社者張清臣主念豐沈桐威芷生兄弟趙開仲及余與張君景謀當時所謂碧桃七

子者也景謀績學工文章試輒冠其曹南昌彭
文勤公之校士於吳也贈景謀以句曰曲江風
度人中秀玉局文章海外奇公爲當代人倫之
鑒而賞識若此則景謀文學可知矣景謀世居
崇明因游學移家吳門吳中人士皆樂與之交
當時同社諸子性情不一景謀獨好爲大言視
天下事無不可爲者王念豐嘗贈以詩云文章
有神交有道海張獨以荒唐鳴蓋以漆園之言
擬之景謀累舉不第僅以六品散官終其身其
歿也無子及門之士凌君介夫實經紀其喪且

繪南園授經圖肖景謀之像於上而侍其旁師弟之間可謂有始有卒矣昔孔子有言與其死於臣之手也寧死於二三子之手若景謀之門有介夫亦可以無憾矣惟是余與諸君結社距今不及四十年而其人無一存者余獨以皤然一叟猶與後生談藝於鄉曲之間拊斯圖也其能無死生契濶之感耶

道光三年賑饑記

道光三年歲在癸未自夏入秋霖雨爲災田禾被淹閭閻乏食四鄉尤甚開府中丞韓公

文綺方

伯玉公

王略

廉使林公

則徐郡

伯額公三邑侯俞公

王公萬公焦心勞思凡可以救災恤患者無所不至業已入告

天子特發帑金以賑之復勸諭邦人之殷實者共敦任恤之誼且各捐俸以爲之倡由是衆心感激踴躍樂輸共集金十四萬兩有奇官賑既畢繼以義賑自是年冬月起至明年春熟而止是役也三邑侯周歷城鄉徧查貧戶以不遺不濫爲主而義賑則分地設廠令紳士之誠信者董其事其事既竣彙其出納之數刻錄徵實俾

邦人共見共聞以明其無私吁古云救荒無善策然荒政十二載在周官而保息之術尤在振窮恤貧今不幸而天災流行降及斯土所幸有仁人在位抱已飢已溺之心多方調劑養民以惠使民以義拯百萬顛連無告之窮黎共登於衽席而免於溝壑之患伊誰之力歟果也善氣所積感召天和明年夏秋之間雨暘時若嘉禾被野萬寶將成此農夫之慶卽牧民者善政之效也不可不書以告方來

收葬無主之棺記

古聖王之治天下也掩骼埋胔載在王制誠欲使人居太平之世生有所養死有所歸所以慰生人之意而安孝子之心也自葬師之術行而人人欲求善地貧賤者牽於衣食之謀而富貴者惑於風水之術由是停喪不葬者比比皆是吾吳爲東南繁盛之區人稠地狹欲求葬地甚難因而棺木浮厝於野者以千萬計道光三年淫雨爲災四鄉積水吳江尤甚野田浮厝之棺漂失者有之棺木朽壞而骸骨零落者有之郡城體善堂會同各善堂司事奉大府之令分赴

四鄉收葬有鄉民阻撓者官純之以法計先後收葬屍棺三萬餘具可爲勇於爲善者矣今夫葬也者藏也掩藏形惡不忍見其親之毀也自世人惑於風水之說將藉父母之遺骸以求福因而停喪不葬及至遇此水災則追悔無及試思風水之說昉於郭璞璞及身不得其死子孫無聞則祖其說者果能致福否乎古者葬有定期自七月至於一月貴賤有等從無經年累歲之事而今之言地理者動曰山向有利有不利何以大異於古人耶余因善堂收葬無主之棺

而并著此說以勸夫世人惑風水之說而停喪不葬者

關帝廟玉印記

古人有言國之大事在祀與戎夫郊社宗廟之禮自三代至今未之或改其他鬼神之祀則與時爲盛衰今之神祠莫盛於關聖矣自漢以來或稱侯或稱公迨宋宣和五年封爲義勇武安王此王之號所自始明萬歷十八年封爲協天護國忠義大帝此帝之號所自始

本朝乾隆三十三年加封忠義神武靈佑關聖

大帝靈佑之號自此始矣今神之祠編滿域中
吾蘇城中飲馬橋有關帝閣父老相傳謂明祖
破張士誠時兵由盤門入明祖怒蘇民之爲張
氏久守也將盡屠其人至飲馬橋而見關聖現
像因而戢兵其時蘇民之得免於死者皆神之
力邦人感其生全之德故立廟橋上以祀之然
則神之靈固大有造於吾鄉之人矣廟有靈佑
大帝四字玉印近歲失去河南河務同知顧君
禮璜知其所在贖金贖而返諸廟恐其久而復
失也屬余記於祠之壁俾後之人有所考焉

重修福濟觀純陽呂祖師大殿記

代巡撫陳公作

粵維嘉慶十年尚書姜公晟奉

命觀河歸以純陽呂祖師靈佑之功敬告

天子有

詔于淮陰建祠崇祀

欽定燮元贊運之號冠諸原銜之上仍令直省
大小守土之吏各於有廟處所春秋仲月諏吉
致祭三獻九拜如禮惟祭物止用菓品饌餅不
具牲牢以符真一清靜之化煌煌鉅典載在禮
官所謂籩豆之事則有司存者也乃事當肇始

或闕焉未舉子撫吳之歲詢諸邦人吳郡舊有
福濟觀在城中西北隅向爲士民崇奉呂祖師
之所近歲遭鬱攸之災方議修建未復舊觀余
於仲春之吉入廟致祭親見夫棟楹草創像設
猶虛上雨旁風神無寧宇爰率屬捐俸鳩工庀
材塗茨丹雘次第畢舉夾牕重屋鳥革翬飛復
拓南榮三楹以爲祭時行禮之地是役也經始
於嘉慶己卯孟夏之月至仲秋而落成凡用金
錢二百四十萬有奇而士民草創之費不與存
焉工旣訖官民請紀其事竊惟國之大事祀居

其一唐虞三代以後惟類帝禋宗古今無所沿革其他羣祀皆因時制宜若漢之祀明星太一唐之祀壽星媼龍宋之祀酺神大角皆是也記曰非天子不議禮蓋朝廷者禮之所自出凡禋祀之舉重以

天子之命則馨香所被義協人天今

天子聖德神功超越今古懷柔所及山川百神靡不散格況呂祖師丕宣道妙宏範諸天載諸祀典上以爲

國家縣祈天永命之庥下以爲蒼生致錫福弭

災之應某職典封圻其敢弗虔其敢弗恪以對
揚

天子休命謹拜手稽首而爲之記

餘姚縣重修學宮記

代長子同福作

昔王文成倡良知之學其說也本自孟子而文
成闡發之所謂良知者根於性之本善而發見
于愛親敬長古今聖賢所垂教以誨人者不外
乎此朱子曰明德者人之所得乎天虛靈不昧
具衆理而應萬事以是證良知之說何以異哉
後生小子因于朱陸異同之說強生分別遂以

尊德性道問學爲兩事宗朱者攻陸并攻文成
曾不思德性稟乎天而學問起於人舍德性而
言學問則學問亦何所附麗哉吾故謂孔門心
學之傳宋時則在考亭明時則在姚江余於嘉
慶二十四年來宰餘姚旣受事祇謁夫子廟堂
見夫棟宇翼翼俎豆莘莘周覽殿庭輪奐清肅
規模大壯詢諸故老知前宰鹿公某于嘉慶十
八年來此當下車之始見夫學宮頽廢倡衆捐
修邑人踴躍襄事一年而大成殿兩廡并崇聖
祠魁星閣宮牆泮池次第訖工繼者徐公某來

復申前議於是明倫堂尊經閣昌黎祠名宦鄉
賢忠義三祠江南北諸紳士分任其事歲在丁
丑一律告成美矣備矣尊師重道崇德報功此
邦風俗之善於此可徵邑之人將紀其興修歲
月及樂輸者姓名以垂示方來請余爲文以壽
諸樂石予維是邦爲文成長之地流風餘韻
至今尚存故士習民風尊道德而尚文章彬彬
乎有鄒魯之風焉雖然學校者

國家養士之地也士之生斯世也必修於家而
獻於廷以爲當世有用之材方不負

朝廷作養之恩古人云太上立德其次立功其次立言是之謂不朽若文成者其德其功其言皆爲古今不朽之業此邦人士皆其後進也仰其學行頌其訓言倘有奮發興起不讓美於先賢者乎是則余之所厚望也矣

獨學廬四稿卷一

獨學廬四稿卷二

東吳石韞玉著

文二

張氏四書集解序

近歲士人崇尚漢學宗許氏者究心於形聲意
事之與宗鄭氏者畢力於名物象數之繁其於
四子之書視爲科舉之業而於孔孟傳心之要
未之有聞也此其人自以爲修學好古而其實
與俗學等崑山張君子海殫一生之心力著成
四書集解一書其書博采諸家之說仍以朱子

爲歸其有與朱子異同者並存之以備叅攷此
真儒者本原之學也夫道若大路然東西南北
之人並行而不悖自朱陸異同之說起而學者
各存門戶之見以讀書談道爲角勝之場功業
文章若王文成而或者比之洪水猛獸於我心
有憾感焉卽朱子有靈亦未必以其言爲是也
他如西河毛氏專以瑕疵朱子爲能辨則辨矣
於孔氏一貫之學亦無當也張君此書不執古
注疏不執朱子集注臚陳衆說而折其衷此古
人所謂實事求是者歟予故樂爲之序

三國志辨微序

陳壽良史也承司馬遷班固之後作三國志夫
犧農以來中國帝王無不大一統者故春秋史
漢諸書皆統於一尊以明無二上之義至黃初
以後其局一變禹貢九州之地忽焉三分鼎立
此帝王之勑格也故陳氏作史亦勑其格志名
三國明乎魏之不得統吳蜀蜀之不得統吳魏
惟吳亦然歷晉唐無異說也自朱子作綱目特
標昭烈爲正統後人因之而指擿陳氏之非曾
不思史者傳信者也當其時昭烈之政教號令

其能行於吳魏之地乎吳魏之人曾奉昭烈之
正朔乎正朔之不奉政教號令之不行而曰此
爲中國之君是誣天下後世也作史者不當如
是或者援春秋書公在乾侯之例此又不然彼
時昭公雖出亡其國依然魯國也有國不可無
君故書之若平王東遷孔子亦未嘗於豐鎬岐
陽之地仍冠之以周也果若人言將韓魏趙分
晉之後仍號其國曰晉元順帝遜於沙漠而仍
號中國曰元可乎不可乎然則朱子以昭烈爲
正統非歟曰儒者讀書當心知其意朱子生宋

室偏安之日高宗之在杭州猶之昭烈之在成都倘不以正統歸昭烈是宋亦不得居有天下之名也古人著書立說必尊本朝朱子尊宋因而尊昭烈此勢所不得不然者若溫公當宋室全盛之時其著資治通鑑卽仍陳氏之舊矣而謂溫公之識不及朱子乎是不然矣彼各因乎其時爾後世或是朱而非司馬所謂一孔之儒多目論者非耶南昌尚君儻客精於史學著三國志辨微一書共五卷闡幽發隱一洗從來腐儒迂謬之說有先得我心者因以荒言引其端

吳懶菴經史論序

昔孔子之論學也曰信而好古而孟子則曰盡信書則不如無書然則讀古人之書信者是乎不信者是乎夫古人去今遠矣讀其書者信其所可信疑其所不可信斯則爲善讀書者也吾鄉吳懶菴先生積學好古著爲經史論一編凡一百六十九篇洋洋數萬言上自唐虞三代洎乎秦漢六朝下至唐宋元明無不旁推曲喻析其疑而折衷以求其是凡經與史有異同則信經而黜史史與樸家之說有異同則信史而辨

襍家之誤富矣哉雖一家之言乎實宇宙大文也余嘗謂世閒讀書者有三等人其上者考古證今其意常在經世宰物守先王之道以傳後學若亭林顧氏是也其次講求朝常國故古今因革之宜將以信今而傳後若竹垞朱氏是也又其次則殫見洽聞而運以沈博絕麗之才以發爲文章若伽陵陳氏是也後有作者總之不出此三者之中若其他習科舉之業揣摩當世好尚以爭勝於風簷一日之長者登巍科躋上第則有餘以言乎知人論世則未也吳君早棄

科舉之業而專心嚮學博極羣書其論百世上
下之事若觀螺紋之在掌此所謂修學好古實
事求是者歟是編於君存時已有刊本行世既
刻後復有所作未及授梓而歿令子英合其前
後所作彙爲四卷重加剞劂以蘄壽世刻成已
十二年其重刻緣起尚未有序之者英子志恭
從予游以序見請因濡筆應之吳君名成佐字
贊皇元和人懶菴其自號也

經史管窺序

太倉蕭君曼叔疇昔無一日之雅不遠三舍惠

然肯來修士相見之禮坐次袖中出所著經史
管窺一編歛然下問予受而讀之兩旬始卒業
焉觀其書元元本本博引繁稱言言皆有根柢
無一無稽之言蓋好學深思者也吾因歎夫今
世士大夫學殖之荒落也其故有三初地學人
僥倖於風簷一日之長針芥偶投遽登科第因
而束書高閣永棄筌蹄遂致謬改金根誤呼伏
獵頑碑無字貽笑簪紳此達而不學者也若窮
鄉朴學之士抱四書大全一部私爲枕中秘薈
萃近科房書聞義數百篇奉之如金科玉律終

日埋頭於其中此外高文典冊皆以爲無裨舉
業一切不寓於目或以南華爲僻書或不知堯
舜是一人二人一孔之儒少見多怪此窮而不
學者也其間又有一二高才生英雄自命志在
欺人采張霸之僞書襲揚雲之奇字浮夸弔詭
炫燿人前一犬吠形百犬吠聲雷同附和久假
不歸斥歐九爲不讀書謂蕭統小兒強作解事
以此爲學又所謂似是而非惟庸故妄者也三
者受病不同總歸於學無根柢而已昔班固之
序河間獻王也曰修學好古實事求是士人能

於經史二學好之而實求其是安得有三者之
流弊耶今曼叔以縫掖之士用力於經史其於
經也自天德王道之大以至名物象數之微妙
義紛綸皆折衷於至是其於史也上下三千年
縱橫二萬里了然若視掌上螺紋時時於政治
得失人物臧否發一言以爲之辨論亦往輒破
的於是知曼叔實有根柢之學非苟焉稗販而
已也夫學問之道或源焉或委焉經史爲源也
他說皆其委也河源發於崑崙江源發於岷山
惟其源遠故其流長而浩蕩之勢經兩戒絡九

州而不窮學而發源於經史則俯仰天人之間
上下古今之際將無所不通譬諸江河行於地
中寧有斷港絕潢之阻與今之學者若曼叔可
謂實事求是者矣雖老而不遇乎猶勝夫被文
繡飫粱肉坐廢居諸虛生一世者也

墨海金壺序

常熟張君若雲先收毛氏汲古叢殘之籍彙爲
學津討源一書鏤板行世矣旣又廣搜四部博
采九流得古書之可以附庸六籍者一百十五
種都爲一集名之曰墨海金壺剞劂旣竣未及

行世而若雲遽歸道山其猶子藹亭尋未竟之
緒將託諸副墨嘉惠藝林而介其所親石生榮
奎請予一言爲之序予披覽其目凡九經七緯
以及史氏遺聞軼事旁逮兵農方術稗乘一家
之言無所不臚列而燦陳之此其蒐羅之廣采
訪之勤固非咫聞曲學之士所能及也吾因思
文章一事古人喻之薪火薪盡而火傳則光輝
發越炳耀宇宙薪盡而火不傳則化爲灰燼蕩
爲烟雲歸於無何有之鄉而已作而不述古人
之不幸而亦後人之不幸也遽古典墳燬於秦

火者無論矣卽漢唐所志藝文經籍今日存者
有幾所幸一二抱殘守闕之士網羅散失掇拾
於風霜兵燹之餘而後古人之精神血脉與天
地長存則後死者之於斯文所繫不綦重耶嘗
聞周時浮提之國獻神通善書者二人肘間出
金壺中有墨汁如漆灑之著物皆成篆隸科斗
之字此事載在王子年拾遺記儒者以爲誕豈
知鴻荒旣闢夫意欲助成中土文明之運自有
此等怪怪奇奇之事著在世間孟子所云聖而
不可知之謂神者此也而豈凡夫耳目所能妄

斷其有無者乎今若雲以此義名其書將使金
壺中一點墨灑徧華嚴世界務令古今聖賢文
人才士一切德成藝成之理無不流行於高天
厚地之中讀其書者皆得聰明智慧增益其所
不能此願力宏深非尋常餽飭小言可比而藹
亭表揚流布紹隆勿替亦可謂善成若雲之志
者也因贅荒言弁諸簡端

關聖帝君聖跡圖志序

昔孟子與浩生不害論善人信人而終之曰大
而化之之謂聖聖而不可知之謂神大哉斯言

蓋人負天地陰陽之氣以生充類之以至於盡
必爲聖爲神而後滿其量也漢昭烈之創業於
蜀也關公以腹心之交膺干城之寄其共死生
同休戚大義凜然固足昭垂宇宙矣迺於旣歿
之後靈爽於赫與日星河岳並存於天地之間
有非古今賢豪所能及者孟子曰其爲氣也至
大至剛以直養而無害則塞乎天地之間其公
之謂歟歷代帝王莫不隆其廟號崇其祀典至
本朝尤加敬焉香火之盛自京畿至於九域四
裔無地蔑有春秋之享祀配於闕里斯人之崇

奉也至矣盡矣蔑以加矣謂之曰聖謂之曰神
真有大而化聖而不可知者乎康熙間有桃源
盧湛徧考典籍所載公之事業文章彙爲一書
名曰關聖帝君聖跡旨志讀之者可以知其聖
之所以爲聖神之所以爲神聞揚至教於世道
人心實有裨益此書歲久無傳今上海唐君循
陔重付剞劂以行於世將以翊世道而正人心
其功德勝於世俗造像寫經者萬萬也因樂得
爲之序

孝行錄序

世之人孰不愛其親胡爲乎有人焉獨稱爲孝子人而以孝子名此風教之衰也有鷹鷂之鷙而鳳凰以爲瑞有虎豹之猛而麒麟以爲祥有耒鋤德色箕帚諄語之人而孝子以爲貴夫孩提之童無不知愛其親豈生人之性有孝有不孝耶其不孝也皆積習所移也試以今之人言之富人之所欲世有爭貨財而忘其親者矣貴人之所欲世有貪仕宦而不顧父母之養者矣婚姻人之大欲世有溺愛其妻子而日與父母疎遠者矣此豈秉彝之本然抑父兄之教不先

子弟之率不謹愆敗度而縱敗禮流爲禽獸之行而不自知也然則欲人竭力供爲子職善保其終身之慕必自蒙養始矣世傳二十四孝一書爲明人屠隆所著凡采取子史所載孝行二十四則集爲一編向時鄉塾都有之今吳江某君重刻以廣其傳又每事繫之一詩以致其長言詠歎之意亦深合乎古人與子言孝之道矣經云孝者天之經也地之義也此書雖以養蒙實皆天經地義將與六經四子並垂天壤可也

林和靖詩序

嘉慶丁卯冬予自翰林編修解組歸田寄居於杭城西南隅紫陽山下時時出鳳山門行過萬松嶺放小舟徜徉於六橋南北或登孤山謁林處士祠堂徘徊瞻望想見其爲人辛未歲威勤公以故相節制三江予以舊吏徵入幕府掌文案同時有杭人周右爲公司記室携有和靖先生詩一冊予借而讀之心乎愛矣不忍釋手未幾威勤公內召入閣賓客皆散是詩仍歸周君其後十年周爲江都宰予寄信求是書周遂錄副寄我因授之梓人或曰漢魏六朝以來詩人

多如牛毛之不可數子無所刻而獨刻是編者何也予曰古今人詩不一格有山林之詩有臺閣之詩臺閣之詩近於雅頌山林之詩近於風臺閣者以忠君愛國爲主山林者以樂天知命爲宗詩如和靖先生殆孔子所謂知道者乎夫宋室之興也藝祖以神武之姿削平禍亂再傳至真宗之世海宇乂安可謂小康矣乃一念之侈假託天書東封西禪粉飾太平流及宣政之閒崇尚元教降天子之尊而以道君自號其禍遂至父子客死神州陸沈誰爲作俑者迺流毒

至於此極也和靖先生當仁宗之世窮居野處
蕭然物外宜於當世事無所繫心者乃臨終有
詩云茂陵他日求遺稿猶喜曾無封禪書憂深
思遠若逆料有靖康之禍者苟非知道者安能
出此語殆身在江湖而心存魏闕者歟殆樂天
知命而仍不忘忠君愛國之心者歟曾子曰人
之將死其言也善先生斯語善之善者也先生
在臨江識李諮於疇人之中而以公輔之器期
之學識如先生殆亦抱公輔之材而未及施行
者歟而世之人往往以山林枯槁之士目之是

未可爲知言者也予愛其詩論其世而知其人故著鄙見如此而卽以爲詩之序

明周忠介公文集序

古今國家設科第以網羅天下賢雋必得忠孝節廉之士其胸中蘊畜出可以見功名處可以敦氣節一言一行皆能誦法先民而爲四方所矜式夫然後國家謂之得士士謂之不負科第非是則不足以相副近世科第必發軔於文章而士之心術行誼亦未嘗不可於文章見之端介之士其言必醇正有法度若夫華言風語五

色無主以蘄弋獲於風簷一日之中則其人詭
遇求合始進已然欲求其他日功名氣節卓然
自立於世是求馬於唐肆也有明天啓間魏璫
煽虐以荼毒天下之賢士大夫而吾鄉周公順
昌實與楊左諸君子同及於難方緹騎之至吳
門也市人聞公被逮不呼而集者數萬人公囚
服入公門緹騎倚璫勢甚張言必稱厰公衆譁
曰吾等初以爲皇帝詔書彼乃曰厰公厰公則
魏璫也周公何罪魏璫乃敢然羣起而擊之當
是時吳人義聲震天下夫魏璫執國柄緹騎四

出賢士大夫之被逮者不知凡幾他處無敢齟齬者吳中人乃奮起而挫其鋒世謂吳俗纖弱不可共患難觀周公之事何如耶特是公位不通顯非有功德及民其棄官而歸也伏處委巷中桑戶繩樞饘粥僅自給非有餘力解衣推食於鄉之人鄉之人何以悲憤激發如此而公又何修而得此於鄉人也豈斯人秉彛之好出自天生固有不求而自至者耶邇來士大夫一登朝則志其饜足之道及其老也乃至不敢歸其故鄉而寄居他所以避其親戚故舊或曰恐

其爲吾累也或曰恐不勝其予取予求也人果
廉隅自礪親戚故舊將無所取求而亦安能爲
之累哉惟其專已自封故人人瞰其室而彼遂
避其鄉人如寇讎設一旦緩急其鄉人亦必且
視之如寇讎方快心之不服孰能出死力以爲
之助耶此其人之賢不肖吾不知其視周公相
去幾何然仕宦而輕去其鄉吾知其非賢者矣
張生光熊手公文稿一冊向予問序予亦公之
鄉人秉彛攸好不欲讓里巷細人專美於前故
表而出之并約同人醵金付梓以傳不朽至公

之文醇正有法度望而知爲端介之士此又後生所當取法者也

周介生文集序

明之季士大夫有二寃獄鄭鄮之杖母也周鍾之降賊也然鄭之寃由於溫體仁或有知之者周之寃由於阮大鍼則罕有知之者矣初天啓時吳中文學之士結文社曰應社太倉張采張溥爲之倡而鍾與其兄鑣皆羽翼之鑣字仲馭鍾字介生家在金壇而其聲華震於大江南北其後吳江人孫淳又結復社應之四方高才生

奔走輻輳嗜名者亦蠱乎其間同社者多至二
三千人氣燄熏灼固已爲當路者側目矣崇禎
之改元也懷寧人阮大鍼以魏閹之黨削籍遯
跡南都諸生吳應箕作留都防亂揭帖申其罪
介生輩附和之阮切齒於諸人而無如何也及
福王建國南都馬士英執政柄阮得而左右之
凡在兩社主名者皆欲文致其罪以爲報復之
計而介生適自北歸墮其陷阱考松江董含三
岡志略所載金壇周鍾降賊事云賊移檄州郡
有君非甚暗孤立而煬蔽恒多臣盡行私比黨

而公忠絕少獄囚累累士無報禮之心征歛重
重民有偕亡之怨又賀賊卽位表有一夫援首
四海歸心比堯舜而多武功邁湯武而無慚德
云云皆出介生之筆按介生中崇禎癸未進士
改庶常賊移檄時介生方應試服官何從爲賊
草檄至賀表所云乃黃巢卽位時語尤與明季
無涉也總之國破君亡介生不殉其難是其所
短然業已南奔則不從賊明矣若馬阮訾毀士
人有何定論仲馭以迎立襄藩爲罪而斃於獄
介生以代賊草檄爲罪而誅於市皆當時羅織

之詞維時吳應箕亦被逮在獄福王失位馬阮
逋逃應箕棄閒出獄而介生兄弟先事被僇此
其中有幸有不幸焉世人因董氏之說而皆目
介生爲逆臣此皆耳食之論也予故因序介生
之文而詳論其事本末如此若介生之文危言
讜論不絕於篇必非僉壬之徒所能出當亦論
世者所能知也

袁文箋正序言

天地之道一奇一耦文章載道之器故有奇而
不能無耦焉漢京魏東駢體漸作至六朝而大

盛凡朝廷典冊軍府文移史官論讚公卿啓事
朋友竿牘以及浮屠老子之書豐碑幽宅之銘
無往而不駢體者其文炳焉與六藝同風杜少
陵曰王楊盧駱當時體不廢江河萬古流誠鄭
重乎其言之也當今崇尚古學惟翰林供奉之
文尚沿聲律對偶其他皆用古文故駢體非藝
林先務然習而工者亦不少其人仁和袁簡齋
先生之論則曰

本朝開國以來尚未有能以四六成一家之言
者竊欲自立一幟闢其意殆自命爲當代第一

手矣先生抱沉博絕麗之才胸羅萬卷筆掃千
人所著詩古文靡不升古人之堂而躋其載特
斤斤以四六自命倘亦果有出乎其類拔乎其
萃者耶余少學爲古文不習駢體自入翰林後
職有司存偶一爲應奉之作所作不多心亦不
好也洎爲外吏益棄去不復省邇來歸田無事
重鑽故紙聊以消耗壯心適得是編覺其鯨鯨
春麗怪怪奇奇真天地間別是一種文字近世
果無能頡頏者劉舍人所謂樹骨訓典之區取
材宏富之域殆庶幾焉顧其學博其辭瞻直如

杜詩韓筆字字皆有來歷讀者不知所出輒茫然興望洋之歎迺不揣固陋於三餘之暇倣李善注文選之例一一箋釋之間有舛訛則加按語以訂正之夫人讀書既多涉筆卽奔赴腕下不能字字檢點古今通人類皆如是不必爲先生諱也積三年之功大約得其十之八九同學之士請曰天下之寶當與天下共之是編也讀者每苦於欽其寶莫名其器今既十得八九可以出而示人矣古人撐犁不識爆稍不知必欲一字不遺一事不漏恐非可以旦夕期也余曰

諾因授之梓既梓後復有所得卽補於本文之
尾或誤注者亦隨時訂正於後尚有闕誤惟冀
高明之士補正之

謝東墅先生食味雜詠詩後序

韞玉於乾隆己亥舉於鄉實出嘉善謝公之門
公家居浙之楓涇早歲以文學知名鄉曲間
純皇帝之初巡江浙也公迎

鑾獻詩召試入格以中書舍人起家壬申登第
入翰林爲編修故事翰林有撰文者十員以文
學之優者充其選卽古代言之職也時有滿洲

大臣物故公適當制其人先由散秩大臣而升侍郎公文內有由散秩而升卿貳之語散秩大臣清語謂之蘇拉昂邦繙譯者不諳漢文繙散秩爲蘇拉而落去昂邦二字

上覽之曰蘇拉者閑的兒也國家豈以閑的兒爲卿貳大臣耶公遂坐撰文失體褫其職時傳文忠公方執政知公學行延致賓館課其子福隆安卽

高宗朝之四額駙也久之恭逢

萬壽聖節公以廢員進獻詩冊文忠又薦其才

有

詔復原官旋侍值 上書房教授 皇十一子
卽今之成親王也先是 皇子讀書四子易詩
書三經竣業卽爲學成公加授禮記左氏春秋
胄筵之全肄五經自公始也嘉慶初韞玉亦值
上書房每聞 成邸言及公猶惓惓不置云
公兩典江南鄉試兩督江蘇學政衡鑒精覈得
人最盛而乾隆辛丑公以少宰主春官之試同
事者有少司馬吳玉綸士之不第者造爲蜚語
曰謝金匱抽身便討吳香亭倒口卽吞蓋公號

金圃香亭亦吳之號也此二語實出稗官寄園寄所寄中兩公之姓適相合故瑁璫者移易其詞以騰口說耳俄而言者以聞

上信疑叅半因公曾督學江蘇吳亦曾督學福建遂密詢兩省封疆吏江蘇巡撫閔鶚元覆奏以道路之言事無實迹而閩督李侍堯有幕客李三俊者亦辛丑之不第者也代李草奏文致其詞

上以事雖無實而清議不諧姑降一官於是吳降三品卿公亦降爲內閣學士後於己酉歲三

月初 上書房諸臣以會試期近候主文之信
同時皆不入值

上聞之震怒並予謫降公遂降爲編修免入
上書房仍

命在 武英殿修書其後辛亥春大考翰詹公
卷已列三等後既呈覽

上指公卷曰此必謝墉之作拆封果然移置前
列知

上之眷公始終不衰也嘉慶四年

仁宗親政睠懷舊學贈公三品卿時公已謝世

不及見矣公荷

兩朝知遇之隆而一挫不起豈非命歟此卷詩
公暮年養病而作雖一時寄興之筆而考据精
博非古之所謂遇物能名者耶亦可以見公名
物象數之學其深如此孔子曰多識於鳥獸草
木之名公其有焉韞玉向在翰林習聞中朝舊
事故知公本末如此惟恐他時後生撫耳食之
言而妄生擬議故詳著其事附於此詩之後俾
共知公之晚節偃蹇蓋亦无妄之咎云爾

謝東野先生六書正說序

近年來儒者崇尚漢學皈心許鄭之說釋經者必康成解字者必叔重記醜順非牢不可破一孔之儒多目論其信然歟夫鄭康成多臆說漢季孔文舉早言之矣若許氏說文解字尚未有深著其失者韞玉向攬許氏之書私心頗不謂然意欲別著一書自伸其說而宦游行役不能專其業今老矣此事迄用無成彼許氏之失姑無論其他止如劉爲國姓卯金刀之說早著於西京而許氏改劉作劉不知其何所本也字見於六經不一而足無不作助語辭者許氏獨

訓爲女陰豈非臆說此其謬之最顯而易見者
此外支離穿鑿之語悉數之而更僕不能終也
夫文字之變古今異同鈔寫流傳原難執彼以
證此然刻石之存於今者莫古於岐陽石鼓今
以其字證諸說文不合者過半則許氏師心自
用之意略可見矣吾師此書根據金石古文奧
衍精博自成一家之言皆足以正許氏之失太
史公所謂好學深思心知其義非可爲淺見寡
聞者道也世之習小學者觀此亦可不迷於復
矣乎

凌波閣藏書目錄序

余性淡漠無所好惟好蓄書自弱冠以來至今積至四萬餘卷其閒聚而散散而復聚匪朝夕之力今年過耳順慮聚者之將復散也謀所以保守之者乃於所居花間草堂之西滌山潭之上築小樓三間以爲藏書之所樓向東背西取其朝暮有日色入樓中無朽蠹之患書凡分十類曰經曰史曰子曰專集曰總集曰叢書曰類書曰地志曰詞曲小說曰釋道二藏貯爲二十厨排爲六行兩兩相對標其類於厨之闌索

其書檢之卽是而法書名畫金石文字亦附於其中於庫余之有是書也談何容易余家本寒微先世藏書甚少憶十四歲附學於中表黃氏之塾主人有書二櫝先生方授科舉之業惟經義是訓他書禁勿觀余於常課旣畢之後每竊一燈私取其書翻閱之如是者四年櫝中書讀之殆徧旣於甲午歲赴省試在金陵市中購得史記一部歸而讀之大喜每夕擁衾側卧燃一燈於几丹黃在手樂而忘疲往往達旦閱十旬而卒業焉其後年漸長蓄書亦漸多每得一書

必手加點勘既舉於鄉奔走四方者十年謀衣食之計嘗游州郡幕府每出門必携書一篋刀筆之暇藉以消日歲終則歸而易之迨進士及第之年則已讀書七千卷矣翰林清暇文史足用及出守蜀中時方兵戈載道孑身獨往家人留止都門乃有奴子吳壽者略識字輒竊予架上書鬻諸琉璃廠書肆書賈遇余點勘之書則倍其直以收之於是余所讀舊書略盡余生平惟此一事所爲歎息痛恨者也其後稍稍購求二十年來又得此四萬餘卷凡此皆節衣食之

費而置之者也。耄年心力疲憊，不能如嚮者之尋章而摘句，然每得一書，未嘗不觀其大略也。吾鄉曩時頗多藏書之家，若錢氏絳雲樓、徐氏傳是樓，不及百年，其書皆消歸烏有。而寧波范氏天一閣藏書，自明至今，歸然獨存，其守之必有道焉。子弟雖多，產可析而書不可析，鍵其戶必子孫羣集，然後啓。雖有顯者，不借此范氏藏書之法也。古人云：積金與子孫，子孫未必能享；積書與子孫，子孫未必能讀。然積金既多，賢者損其智，愚者益其過；積書者，子孫卽不能讀，亦

不致損其智益其過而爲之累也且一時子孫不能讀守之以俟能讀者亦未必終無其人也余藏書之意如此子孫能讀固佳卽不能讀慎毋視如土苴而棄焉是則余之厚望也夫

洪氏集驗方序

此集驗方八卷南宋洪文安所手輯文安名遵字景嚴皓之仲子以博學鴻詞中選起家爲秘書省正字孝宗朝官至資政殿學士方遵登制科時高宗因皓遠使推恩卽命遵入館詞科中選卽入館蓋自遵始非故事也宋祖宗之朝君

相以愛民爲務官設局以醫藥施舍貧人故士大夫亦多留心方書如世所傳蘇沈良方許學士本事方之類蓋一時風尚使然夫古人立方各有深義今世庸醫不知其理妄行增損遂有學醫人費之誚憶孫淵如先生有言令世外科每奏奇功而內科不能者外科用古方而內科不用古方之故也余往日刻新安程氏易簡方論一書亦欲世人稍知古方本義今復翁此書之刻殆與余有同心也夫

功過格序

人生宇宙間不可一日無功牛之畊也馬之任重而致遠也雞司晨而犬守夜也蠶之吐絲也蜂之釀蜜也雖禽獸虫豸無不有功於人豈有人而不如禽獸虫豸哉且人爲萬物之靈天生萬物以養之人而各遂其生天之意也因而縱其嗜欲以暴殄天物豈夫之意哉孟子曰人能充無欲害人之心無所往而不爲仁也世之人豈皆有害人之心惟欲專利於已斯有害於人矣是故萬物在世皆有功無過至於人而功過相參焉甚且有過而無功焉豈人性之善不如

物耶物無欲而人有欲也故曰養心莫善於寡
欲昔袁了凡有功過格之設所以勉人爲善者
深切著明今葛君雨田重刻其書且推廣焉凡
可以遏人欲而循天理之說無所不錄善哉其
善與人同之意也傳曰人之欲善誰不如我讀
是書者皆以葛君之心爲心寧非風俗人心之
助耶君之二子亮寅亮采皆受業於吾門恂恂
然守弟子之職今於此卜其門之將大故樂爲
之序雖然知之非艱行之惟艱人人知善之可
爲而身體力行之爲難易曰積善之家必有余

慶善貴乎積而非一言一行之謂奉行此書者
但當自省其身務使功日多而過日少以漸至
於端人正士之域若區區責報於天之說姑置
之勿道也

重刻太上感應篇圖經序

世之人修德不求報者上也雖然上德不德豈
易言哉惟生有最上善根者能之未可概責諸
林林之衆也至於福善禍淫之理人人知之然
不能人人行之者蓋無人時時提撕警覺之耳
書曰惠迪吉從逆凶大禹之言也作善降之百

祥作不善降之百殃伊尹之言也易曰積善之家必有餘慶積不善之家必有餘殃孔子之言也以三聖人覺世牖民之術參天地而炳日星而所言若合符節如是則其理豈不可信哉此太上感應篇一書出於道藏其所言詳悉周至而世之人因其爲道家之言而忽之抑思福善禍淫之說垂自先聖先賢四海以外六合以內人同此心心同此理彼釋氏天堂地獄之說論者猶謂可以補帝王政刑之所不及而况如斯篇平易近人者乎吾鄉惠紅豆先生曾注此書

載在道藏彼大儒也尚留意及此則此書之有益於人可知矣葛君兩田性喜勸世前刻功過格一書業已行世矣茲復取太上感應篇圖經一書重付剞劂將使愚夫愚婦一展卷而了然心目之間其於世道人心良有裨益而士之誦習詩書者於吉凶消息之理固昔者所習聞讀此書可以與書易三聖人之言相印證所患者知之非艱而行之艱也

醫藥局徵信錄序

道光三年癸未霖雨爲災饑饉洊臻當路諸公

既請於朝而賑之矣又勸民捐資助賑以補其
不足由是窮黎餬口有資而無溝壑之患其明
年六月徂暑時疫盛行蓋因饑寒之困釀而爲
癘疾之憂亦人事所必然亟須補救者也於是
郡中紳士韓黃許諸君子合詞告於藩臬兩司
及府縣請設醫藥局以診夫貧民之有疾而無
力醫藥者時方伯誠公廉訪林公允撥民捐賑
餘銀長元吳三縣各一千兩以給經費設局於
郡城適中之地都城隍廟延請醫士之有名於
時者分班輪流至局施診其後廟局狹不能容

則又分外科幼科於附近之泗洲寺所用藥物
由局購辦給發其病甚不能出門者則醫就其
家診之先是徐君錦潘生維城等已設局三元
坊施診施藥至是合爲一局自六月十一起至
七月二十止局中凡診過病人三萬八千四百
十七號赴外診過七千七百十七號共給藥五
萬一千六百十八劑而先在三元坊局所診者
不與焉事既竣司局務者將出納經費刻錄微
信因爲之叙其崖略如此俾郡之人有考焉